

**TEZAUUR LITURGIC**  
**24 SEPTEMBRIE**

**ACATISTUL**  
**SF. MUCENIȚE**  
**TECLA**  
**DE LA ICONIUM**  
**I**



**MOSCOVA, 2000**



# Акафист святой первомученице равноапостольной ФЕКЛЕ

## Кондак 1

Избранную Христом невесту богозванную,  
святаго Павла ученицу верную и мудрую,  
земнаго жениха и мир презревшую и в подвизех  
пресветло просиявшую, ты, Фекло, мученице  
первая, восхвалим. Ты же, яко у Бога  
дерзновение обретшая, от пагубы страстей и бед  
покрый зовущих ти:

Радуйся, невесто Христова, Фекло  
первострадальная.

## Икос 1

Ангели на Небесех удивишася, узревше души  
твоя сила и произволение: мужескими бо труды  
врага посрамивши, ты, агниц чистых  
священная похвало, первая в священоснем их  
сонме достигла еси Чертога Превечнаго Жениха,  
идеже ныне ублажаема тако:

Радуйся, красото мучеников;  
радуйся, радование дев и жен.

Радуйся, первых пустынножителей образе:  
радуйся, подвижников благочестия правило.

Радуйся, Апостола верховнаго дщи предобрая;  
радуйся, мати иночествующих преславная.

Радуйся, жениха земнаго добре бежавшая;  
радуйся, к Жениху Небесному прекрасно  
притекшая.

Радуйся, агнице Христова пренепорочная;  
радуйся, свеще Господня светосиянная.

Радуйся, еюже вернии утверждаются;  
радуйся, еюже сопротивнии низлагаются.

Радуйся, невесто Христова, Фекло  
первострадальная.

### **Кондак 2**

Видящи умныма очима твоима, Фекло, свет  
любве Божия в души твоей, егда стрелами  
благовестия, от честных уст Павловых  
испущенными, сладце уязвися, за ны Распятому  
воззвала еси : Аллилуиа.

### **Икос 2**

Разум Небесных таин даровася ти, Феоклии  
отрасле, Фекло прехвальная, егда вслед Христа  
устремившись, презрела еси доброту лица  
твоего, паче же лепоту юности. Темже мы, чтуще  
тя, яко вертоград чистоты, приносим ти пение  
такое:

Радуйся, украшение чистых дев;  
радуйся, печате лика апостолов.

Радуйся, разума духовнаго светильниче;  
радуйся, подвига страдальческаго краю.

Радуйся, мечу, стремления страстей посецаяй;

радуйся, путю, в Небесный Град востекаяй.  
Радуйся, сподвижнице мужей апостольских;  
радуйся, ветве и рождие Лозы, Христа.  
Радуйся, свещнице трезвения и мудрости;  
радуйся, огню духовных любве.  
Радуйся, грозо на ярость вражию;  
радуйся, молние на  
Радуйся, невесто Христова, Фекло  
первострадальная.

### **Кондак 3**

Силою Вышняго осеняема и Духом Божиим  
напаяема, Фекло, благодати росу в сердце твоём  
сбравши, живоносный кладезь показала еси,  
исполнь даров Утешителя, источаяй же словеса  
от Слова Превечнаго, имиже орошаемии славят  
Святую Троицу: Аллилуиа.

### **Икос 3**

Имущи, дево, сердце, возжженное пламенем  
любве Жениха твоего, Христа, обручника своего  
Фамира абие отреклася еси, жития  
равноангельнаго возжелевши и вся, яже суть в  
мире, во уметы вменивши, якоже Павел тебе  
образ подражания подаде. Сему дивящеся, тако  
тя величаем:

Радуйся, щите воздержания;  
радуйся, двери благочестия.  
Радуйся, мрак страстей на земли разгнавшая;

радуйся, богатство на Небеси стяжавшая.  
Радуйся, храме священія световиднейший;  
радуйся, скиние житія добронравнаго.  
Радуйся, яко словом твоим сердца утучняются;  
радуйся, яко тобою потоцы греховнии  
изсушаются.  
Радуйся, упование кротких агниц;  
радуйся, венче преподобных дев.  
Радуйся, источниче струй благодатных;  
радуйся, верте цветосаждений Райских.  
Радуйся, невесто Христова, Фекло  
первострадальная.

#### **Кондак 4**

Буря тягостных искушений возста на храм души  
твоя, о Фекло мужемудренная; ты же, ревность  
имущи Божественную, от Павла уведевши во  
узилище о Камени краугольнем, Христе, на  
Онаго исповедании утвердила еси скинию  
сердца, в нейже воспела еси : Аллилуиа.

#### **Икос 4**

Слушаючи отца твоего по духу, Павла апостола,  
сподобилася еси во образе того узрети  
укрепляющего тебе Христа, Егоже волею  
пламень тя яко чертог окружи, егда введена  
бысть во огонь велий; и облак, воды и града  
исполнь, излился. Чудо же сие в едяще,  
научаемся ти звати, добропобедная Фекло, сие:

Радуйся, нравов благих сокровищнице;  
радуйся, Истины первосвидетельнице.  
Радуйся, богатство целомудрия неоскудное;  
радуйся, страже Иконии неусыпаяй.  
Радуйся, яко тобою Христос возвеличился;  
радуйся, яко тобою враг посрамился.  
Радуйся, столпе чистоты, до Небес досязаяй;  
радуйся, свете любви, вся концы просвещаяй.  
Радуйся, копие, закалающее всякую страсть;  
радуйся, реко, орошающая землю душ.  
Радуйся, гласе Премудрости;  
радуйся, изобильный кладезю милости.  
Радуйся, невесто Христова, Фекло  
первострадальная.

### **Кондак 5**

Боготечною звездою темный мир осияла еси, о  
первая страсотерпице Фекло, яко адамант  
явльшися во страданиях многих и образ бывши  
добраго исповедания. Тобою бо луча Солнца  
Правды, Христа, возсия, нощь греха  
разгоняющая и пети с тобою Тому  
воздвизающая: Аллилуиа.

### **Икос 5**

Видев благолепие лица твоего, о Фекло,  
Александр зверонравный на честь твою  
посягнути умысли; ты же, девство твое  
положивши хранити, исповедала еси обручение

свое Христу. Того ради, мужество твое поминающе, тако песньми немолчно тя ублажаем:

Радуйся, луче славных победоносцев;

радуйся, крепкая поборнице исповедниц.

Радуйся, дохновения Свыше мироположнице;

радуйся, Царства Святыя Троицы украшение.

Радуйся, девство твое, яко дар, Христу принесшая;

радуйся, сосуд освящен Духа Святаго явльшаяся.

Радуйся, злых человек поправшая лесть;

радуйся, Живодавца привлекшая благодать.

Радуйся, знамение любви Творца;

радуйся, возбранение

Радуйся, правило доблемысленных жен;

радуйся, образе мужественнаго дерзновения.

Радуйся, невесто Христова, Фекло

первострадальная.

### **Кондак 6**

Проповедницу славы Триединого Бога себе показала есе, о Фекло прехвальная, егда силу богоборца, иже во Антиохии, богоугодным противлением победила еси. Зверем же дивиим бывши предана на снадение, неврежденна сохранилася силою Жениха твоего; Емуже, краснейшему паче всех человек, воспела еси: Аллилуиа.

## **Икос 6**

Возсиявый в сердце твоём Христос, Свет Истинный, богодейственной десницею Своею ярость зверей устави; и паки, тебе наутрие вданней львом и медведем, нрав их на тихость и целомудрие преложи, львицу же защищати тя, дево чистая, научи. Все зрящи о сем ужасахуся; мы же, вернии, вопием ти:  
Радуйся, Истины благовестие;  
радуйся, богословия уста.  
Радуйся, ластовице, возлетевшая от деяния к созерцанию;  
радуйся, соловей, вдохновенный наитием Духа.  
Радуйся, цветоплетенный подвижников венче;  
радуйся, преизобильный учений поточе.  
Радуйся, яко уста зверей затворяеши;  
радуйся, яко Горнюю Скинию украшаеши.  
Радуйся, утверждение Вышня светлости;  
радуйся, основание твердаго благочестия.  
Радуйся, светлаго чертога наследнице;  
радуйся, крина чистоты  
Радуйся, невесто Христова, Фекло первострадальная.

## **Кондак 7**

Хотящи Трифену вдовицу в вере наставити, той слово Жизни благовествовала еси, она же, о воскресении мертвых уведевши, молитв испроси о усопшей дщери своей. И абие ты пламенне

возопила еси: Иисусе мой, Сыне Вышняго, помяни душу преставльшияся Фалкониллы, да воспоет Тебе выну песнь на земли живых: Аллилуиа.

### **Икос 7**

Новое чудо смотрения Своего яви Господь, егда жены богомудрыя ввергоша во езеро со зверьми благовонныя нард, амом и кас ию, во образ мира благоуханнаго, имже запечатлеса баня пакирождения твоего. Тогда бо облак огненный тело твое сокры, гады же оныя умертви, во еже зывати всем:

Радуйся, Иисусово многоценное миро;  
радуйся, Утешителев несокрушимый сосуде.  
Радуйся, невещественных Ангелов общнице;  
радуйся, подвизающимся человеком наставнице.

Радуйся, высоту добродетелей пренебесных;  
радуйся, разума глубино дев премудрых.  
Радуйся, богомыслием себе укрепившая;  
радуйся, благодатию звери лютыя укротившая.  
Радуйся, душетленных страстей истребление;  
радуйся, нравов благих насаждение.

Радуйся, за немощствующих к Богу ходатайство;  
радуйся, во искушениях сущих предстательство.  
Радуйся, невесто Христова, Фекло первострадальная.

## **Кондак 8**

Странное чудо, дево богохранймая, мучителие твой и людие вси узреша, егда привязанней ти разъяренным тельцем, оных свирепая устремления укротишася, на тебе почивающею Божиюю благодатию, еяже действием уверовавшии воспеша вся содержащему в длани Своей Творцу: Аллилуиа.

## **Икос 8**

Вся осиянна была еси светом Фаворским, Фекло, Сияния Отча святая избраннице; темже убо безлунный мрак идолюбесия, безбожия же и упорства иудейскаго расточила еси, концы вся просвещающи и наставляющи вопити тебе сице:  
Радуйся, буесловных падение;  
радуйся, безмолвствующих умудрение.  
Радуйся, Света немерцающаго причастнице;  
радуйся, радости неотъемлемыя тайннице.  
Радуйся, диадимом достойных жен;  
радуйся, тайнозрительнице славы дев.  
Радуйся, кивоте Божиих даров;  
радуйся, ковчеже благ Небесных.  
Радуйся, горлице чистая и нескверная;  
радуйся, светило девства и целомудрия.  
Радуйся, звездо умнаго благомощия;  
радуйся, цельбо душевнаго нерадения.  
Радуйся, невесто Христова, Фекло  
первострадальная.

## **Кондак 9**

Всякое естество Ангельское возрадовася о человецех, уверовати имущих, егда ты, Фекло богопросвещенная, благодати и силы Духа Свята исполненная, Павла великаго благим повелением возвратилася еси в землю отечествия твоего, научаючи пети немолчно Христу: Аллилуиа.

## **Икос 9**

Ветии многовещаннии никакоже могут по достоянию восхвалити дела твоя, Фекло: ты бо Трифене, во Евангелие уверовавшей, высокий образ любве показала еси, ту научивши богатство свое расточити болящим, сиротам, убогим и неимущим, иже, приявше даяния, абие тепле воззваша:

Радуйся, алчущих изобилие;

радуйся, злоскорбящих веселие.

Радуйся, богатство жития светоявленнаго;

радуйся, главизно воспитания богоугоднаго.

Радуйся, манно с Небесе, насытившая нищия;

радуйся, райский нектаре, возставляй падшия.

Радуйся, напаяющая таинственными орошеньми;

радуйся, просвещающая Божественными озареньми.

Радуйся, агнице, Пастырем знаменованная;

радуйся, дево мудрая, Царем избранная.

Радуйся, дерзновения о Христе одеяние

златошвенное;  
радуйся, Евангельския любви изливание  
светлоструйное.

Радуйся, невесто Христова, Фекло  
первострадальная .

### **Кондак 10**

Спасти хотя чрез тебе человек множество,  
путеводительным облаком приведе тя Господь в  
пещеру Селевкийския горы Каламон, идеже  
пребывати тебе, подвижнице, указа; ты же тамо  
постом, бдением и молитвою неисчетная  
искушения препобедивши, воспела еси Дивному  
во святых Своих: Аллилуиа.

### **Икос 10**

Стена и град тверд еси, добродеево, всем  
призывающим тя христианом, тебе бо  
благодатию Вышняго дадеся сила творити  
многообразная чудеса: расслабленныя  
укрепяти, слепым очеса отверзати, демонов от  
беснующихся отгоняти; сего ради зрящии  
знамения сия взываху:

Радуйся, чудес неисчерпаемая пучино;

радуйся, даров звездосиятельная тверде.

Радуйся, нечистых духов изгнание;

радуйся, расслабленных возставление.

Радуйся, кормило верное силы душевныя;

радуйся, фиале златый молитвы умносердечныя.

Радуйся, яко люте страждущих гласы слышиши;  
радуйся, яко сущим в бедах предстательство  
показуеши.

Радуйся, еюже древний змий попирается;  
радуйся, еюже прелесть обличается.

Радуйся, изсушение плоти угодное;  
радуйся, утучнение нивы Евангельския.

Радуйся, невесто Христова, Фекло  
первострадальная.

### **Кондак 11**

Пение ти богокрасное подобает, о Фекло,  
воистинну ревнительнице Апостолов сущей: ты  
бо тех стезям последовала еси на земли и многия  
люди, в сени смертной сидящая, благовестием  
Жизни Вечныя огласивши, научила еси Христу,  
Востоку востоков, взывати: Аллилуиа.

### **Икос 11**

Светоприемную свещу святаго девства твоего  
негасиму, о Фекло, сохранить ищущи от злобы  
безстуднейшаго умышления, умолила еси  
Творца, да разсечется скала, во образ  
Богозданныя раки телу твоему, облеченному  
снегосветлою милотию чистоты. Сие чудо  
вспоминающе, тя верою славим:

Радуйся, Церкви Христовы каменю;  
радуйся, низпровержение безбожия.

Радуйся, основание благочестия непоколеблемое;

радуйся, милоте целомудрия нерастерзная.  
Радуйся, яко тобою уязвися человек враг;  
радуйся, яко тобою побежден бысть лукавый;  
Радуйся, вскрай моря жития небурное  
пристанище;  
радуйся, по оному пловцем огню  
путеводительный.  
Радуйся, Небеснаго невестника преддверие;  
радуйся, райския пици предвкушение.  
Радуйся, Богосажденнаго Едема сладосте;  
радуйся, забвение мирския горечи.  
Радуйся, невесто Христова, Фекло  
первострадальная.

### **Кондак 12**

Благодатию Нетлѣннаго Жениха твоего, от  
Гроба, иже бе в камени, тридневно возставшаго,  
боголепный твой образ предивно камень сокры,  
да смотрением Божиим утаится до времени  
дарованный Церкви светильник святыя любве,  
еюже воскриляеми, Херувими присно поют:  
Аллилуиа.

### **Икос 12**

Поюще тебе, о Фекло прехвальная, песнь, ейже  
достояше бы от Ангелов приноситься, величаем  
твоя подвиги, почитаем твоих страданий  
множество, хвалим доблее твое о Господе  
свидетельство, ублажаем же болезни и труды

апостольския и дивимся силе еже ко Христу  
рачения твоего, имже и нас восперяеши ти  
воскликати:

Радуйся, крепосте иноков;

радуйся, сило проповедников.

Радуйся, многоплетенных посечение грехов;

радуйся, многообразных добродетелей воня.

Радуйся, крепосте иноков;

радуйся, сило проповедников.

Радуйся, многоплетенных посечение грехов;

радуйся, многообразных добродетелей воня.

Радуйся, доброто всех родов;

радуйся, душ наших радости.

Радуйся, невесто Христова, Фекло

первострадальная.

### **Кондак 13**

О всечестная первомученице Фекло, святым  
апостолом равная! Нынешнее наше прими  
приношение и богоприятным твоим  
ходатайством укрепи нас в добром подвиге  
веры, милосердия и целомудрия, да с тобою в  
Жизни нескончаемей воспеваем Жизнодавцу  
Господу: Аллилуиа (трижды).

Сей Кондак глаголи трижды. По сем — Икос 1 и  
Кондак 1.